

# In segn da confidenza

Las vischnancas èn obligadas da porscher invista detagliada en il diever da las taxas turisticas

■ **(anr/ac) Il cussegl grond ha adattà il glindesdi passà senza cuntervusch la revisiun parziala da la lescha da la taglia communal e da la baselgia. Ina revisiun che pretenda da las vischnancas ed organisaziuns turisticas trasparenza detagliada.** Las midadas decididas entaifer la revisiun da la lescha da la taglia communal pertutgan ils possessurs da las abitaziuns secundaras sulet a l'ur. La part da la taxa che ha procurà per discussiuns tar ils possessurs da segunds abitadis sa drizzà gia uss a la capaciad e nun è stada tematisada entaifer la revisiun parziala discutada ier en il cussegl grond. Sulet il term «detaglià» ha procurà per ina discussiun in zichel pli intensiva en il parlament grischun. La regenza e la cumissiun predeliberanta han numnadamain proponì da pretender da las vischnancas e da las organisaziuns turisticas l'obligaziun da porscher invista detagliadamain davart il diever dals meds recalgtads da las taxas turisticas. Da la vart da la represchentanza communal en il parlament grischun è vegnida opposiziun vers ils term «detaglià». *Claudia Troncana* (pld, Engiadin'Ota) ha fatg attent a la nova sistematica da la cudeschaziun communal unificgada per tut las

vischnancas grischunas. Ina cudeschaziun che garanteschia la trasparenza pretendida davart il meds incassads da las taxas turisticas. Sustegn ha Troncana retschavì dal deputà e president da la vischnanca da Flem, *Adrian Steiger* (pld, Trin) e dal deputà e landamma da Tavau, *Tarzius Caviezel* (pld, Tavau). *Heinz Dudli* (pbd, Tschintg Vitgs) pincerter ha pledà a favur dad ina obligaziun detagliada e numnà il term sco segn da confidenza, impurtant vers ils possessurs d'abitaziuns secundaras. *Peter Peyer* (ps, Trin) ha menziunà ina mancanza da trasparenza en connex cun il diever dals daners da las taxas turisticas ed ha proponì al cussegl grond da suandar la proposta da la regenza e da la cumissiun. La maioritad dal cussegl grond è stada da la medema opiniun ed ha acceptà il term «detaglià» cun 73 vers 39 vuschs.

## Da la taxaziun da diever a quella da la capaciad

La revisiun parziala da la lescha da la taglia communal porscha a las vischnancas in rom per adattar las leschas communalas. In motiv che la regenza ha desistì dad ina procedura da consultaziun, sco quai che la cussegliera guvernativa *Bar-*

*bara Janom Steiner* ha accentuà en la debatta d'entrada. Ella ha ditg che las discussiuns politicas pli brisantas vegnian dischlocadas en las vischnancas che sappian decider, entras la revisiun, sch'ellas veglian midar, entaifer la taxa da giasts, tar ina taxaziun da capaciad. La revisiun procura per dapli segirezza legala tar las vischnancas. Ina segirezza che fa prescha. Janom Steiner vul introducir la revisiun parziala da la lescha l'entschatta dal mais fanadur 2018 per pussibilitar a las vischnancas dad attatar lur leschas sin l'entschatta da l'onn 2019. In ulteriur motiv per la regenza da desister da la procedura da consultaziun. Perencunter ha ina gruppa dad experts accompagnà la revisiun. In agir che ha procurà per singula critica en il cussegl grond. Critica che ha intimà la cussegliera guvernativa a la confermaziun ch'ella na vegnia segir betg pli a lantschar revisiuns da leschas chantunalas senza ina procedura da consultaziun. Il temp d'uffizi da Janom Steiner sco cussegliera guvernativa terminescha la fin dal 2018. Il cussegl grond ha la fin finala acceptà cleramain la revisiun parziala da la lescha da la taglia communal e da la baselgia cun 107 cunter nulla vuschs.



**La deputada Claudia Troncana (pld, Engiadin'Ota) n'ha betg pudì persvader ina maioritad dal cussegl grond da desister da la obligaziun detagliada.**

FOTO Y. BÜRKL